

## **Kerweredd 2009**

	
<b><i>Erstellt von Nino Piazza</i></b>	<b><i>Vorgetragen von Tobias Wohlfart</i></b>

Ehr Leit, kenne meer oufonge?

Es iss soweit, ich bin froh,  
dass heit werrer sou veel Leit sinn do!  
Seit värzisch Johr, des iss famos,  
leeft unsern Umzug uff de Stroß!  
Seit värzisch Johr sinn meer die erschde,  
hier im Kreis unn aach die beschde,  
värzisch Johr, des iss gewiss,  
zwar noch koa long Zeit heit iss,  
doch 40 Johr, die gehern gefeiert grouß,  
sunnscht wär bei uns jo gar nix lous!  
e Jubiläum, des iss klaa,  
gefeiert wärd, ob grouß ob kloa,  
sou griez ich herzlich, eich ehr Leit,  
egal vun wu ehr kumme seid,  
nett nur die Hoambecher, Hepprummer unn Kerscheiser zunichte,  
sondern aach die roigeritschde!

Ich stell eich hiermit vor,  
wer do owwe alles iss do.  
Unser Kerwekönischin in voller Bracht,  
die Carina Langer, ich geb uff se acht,  
in gleicher Schönheit wie Itschdes Jahr,  
newe ihr die Anna Staffa,....  
Nei dezu unn schee uff alle Bilder,  
iss debei die Teresa Tilger!

Bei de Kerweborsch hää ich dohinn,  
dem Gregor sein Sohn, de Schusters Kevin,  
und uff moiner onner Seit, jetzt is er do  
erschtmols de dem Reinhard soin Wolffe-Timo!

E Kerb wie unsri, die macht Spass,  
sou erhää ich jetzt erschdmol moi Glas,  
um bevor ich vielleicht sou monche schocke,  
mach ich mich jetz e bisschen locker!

**Uff Hoamboach unn de Bergsträsser Woi,  
des gehert zusomme, unn des iss foi!**

### **Kapelle: Einstimmungslied!**

Kennt ehr eich noch on vorsjohr entsinne,  
moin Gott wos wos do kold,  
meer hatte jo noch Schnäi im Wold,  
unn om Kerwemondoag, mojends - des wor doll,  
do wor die Stroß mit Schnäi sou voll,  
do hot sou moncher, der mit Schluck-Schluck,  
zuveel Sunndogs ins Gloas noigegugt,  
beim uffsteige donn glei gedenkt,  
meer hätte heit de viert Advent!  
Unn im Owerdorf hot de Kerwereddschreiber, gonz uscheniert,  
de Kerwe- in en Advendskranz mit Beleichtung ummodelliert!

Aach die Kinner hatte ehrn Spass,  
die Schul wor kold unn drauss wor nass,  
die Schulheizung hott katte die Krenk,  
on Kerwemontoag ein Geschenk,  
on Unnericht wor nett zu denke,  
die Kinner durfte hoam sich lenke,  
sou wos jetzt erschmols, des wor foi,  
for die Kinner on Kerwemontag paucke-frei!  
Liewe Lehrer macht sou weiter,  
for die Kinner wär es heider,  
wenn jedes Johr donn Mondogs die Kinner wisse,  
dass se nett in die Schul gäi misse!

Ehr häbst vernumme, gebt gut acht,  
der Mehdorn die Boahn hott in Missginscht gebracht,  
Er hott sich jo net long besunne, un des Personal uff Video uffgenumme!  
Doch aach in Hoamboch iss sou e Gerät installiert,  
gonz Hoamboch wärd do ausspioniert,,  
om Stoakopp, do owwe, dess wisse veel aah,  
stät seit em Johr e Web-Camera!  
Gericht uffs Doal unn gonz galant, unn freie Blick uff Wingertsbonk!  
Ehr glaabt jo nett, des iss de Renner,  
meer kann do alle Leit erkenne,  
ob se laafe orrer hocke,  
meer sieht die Farb noch fun de Socke,  
unn meer sieht gonz uscheniert,wer dort hockt unn wer spaziert.  
Sunndogas mittags, Gott gelobe,  
hott des Ding e Oischartuote,  
die sogar verdrängt gonz krass,  
die Owendsendung „Wette dass“!  
Gonz Hoamboach sieht ehr liewe Leit,  
wer gäit spazieren unn hot veel Zeit!  
Unn mit romanischem Wingertsbonk hocke, do brennt der Köcher,  
es gugge zu 2000 Hoambecher!

Abwrackpärmie, for veel Leit eh Glick,  
gilt des aach for die Deichertsbrick?  
Die in Owwehoamboch voll erschlosse,  
in Politik unn Zeitung macht ehr Bosse!  
Seit John säigt mer, die muss meer mol saniern,  
alle Leit dun dischbediern.  
Meer heet se saniern schun kenne,  
unn e paar Euro in die Hend nemme kenne,  
Leit worn do, doch wurd nix draus,  
nur linke Hend aus em politische Haus!  
meer breischde erschd e Baugutachte,  
die veek koschde un nis mache,  
Bauplaner und Architekten,  
Wertgutachter und onnern Verdeckte,  
Statiker und sou Konsorte,  
Wischischduer aus aller Orte.  
Doch bis heit is nix bassiert,  
unn wos hot meer dischbutiert,  
100 000 Euro säigt des Wertgutachte,  
ach do driwer muss ich lache,  
orrer soll ich etwa flenne,  
meer heets ohne die Owwere billischer hou kenne.  
De Ohlhausers-Wili is mim Budogg driwer spaziert,  
unn dem is schließlich aach nix bassiert!

**Rosenkönigin:**

**Druff houch des Glas, kummt gebts meers hin,  
Dorschd hott aach die Kenischin!**

## Lied: Kapelle

Hoamboach katholisch jo schun voll erschlosse,  
macht jedes Johr Wallfahrt dess sin koa Bosse,  
noch Dieburg , ach iss des sou weit,  
leeft alls e Grupp ehr liewe Leit.  
Vorsjohr hot sich unsern Boimoschder besunne,  
unn sich aach mol vorgenomme,  
als Radsportler mit veel Profil,  
des bissel laafe wär nett viel,  
des mach ich ruckzuck, bin fit unn uff Zack,  
dess reis ich on oam Backe ab!  
Des mach ich mit gonz lockrer Holtung,  
genausou wie in de Stadtverwaltung!  
Doch ehr Leit, es wusst schun jeder,  
bereits noch nur 5 Kilometer,  
häwwe dem Herbert, er hot sich bemieht,  
bereits die Soule fun den schlecht Schuh geglieht,  
Noch 10 Kilometer, des sinn koa Bosse,  
hott sich der Gerhard Herbert faschd hänge losse,  
noch 20 Kilometer, des ging ruckzuck,  
worn die Schuh donn gonz kapputt,  
letztlich wor es schun e Wunner,  
das er in Dieburg ougekumme!

Doch ehr Leit, bleibt bitte heiter,  
der Leidensweg, der ging noch weiter,  
om Owend dehom, wos wor der frou,  
die Fieß kaputt unn nix mäi drou,  
die Blose wurde rout voll Blut, des wor nett schäi,  
der Bojemoschder, der konnt nett mäi,  
soi Frau, die hott, obwohl er nett wollt,

donn noachts de Dokter noch geholt,  
und hott ehm, ehrfrüschdisch die lose,  
Blutblöse geöffnet, unn zwar die große,  
souwos neen ich ohne Spass,  
en politische Aderlaß!

Dodruff oner trinke, ja dess is foi,  
houch des Gloas unn noi de Woi!

### **Kapelle: Das wandern ist des Müllers Lust!**

Adriana, Italiano hier om Platz,  
hott uffgemocht gonz ohne Hatz,  
Spagetti, und e guti Pizza,  
hoch lebe Hoamboch-Italia!  
Die nei Wärdshaft hott uffgemoacht, do you remember,  
ich mon es wor de erschde November,  
des nei Lokal, des iss e Wucht,  
sowos hot Hoamboch lengschd gesucht,  
Mensch wos wor do drinn wos lous,  
Kinner, Olde, kloa und grouß,  
sogar Hepprum und Erbach, die sinn neidisch,  
sou e Hall suche se, des iss unbeschreiblich!  
Doch als die Eröffnungsfeier wor im Gonge,  
moncher verspürte, dess is koa Wonne,  
en Druck uff Bloos un hinne naus,  
doch des ging nett, wos en Graus.  
Denn meer durfte nett um diese Zeit,  
leider nett uff die Örtlichkeit.

Des Kloa wor dicht und aach verstoppt,  
des Hauptrouer zu, bin ich bekloppt,  
meer kam do jo schun in de Sinn,  
wu iss de Engpass, wu hengst drinn?  
Des konnt nur soi, wos e Blamasche,  
e Hepprummer Klärwerks-Sabotasche!

Noch zwaa Stunn, ich wor debei,  
wor de Abfluss werrer frei!  
Doch nur, weil mehr konnt besteche,  
mit 5 Pizzas und em Reche!  
defor Hepprums Wasseromt debei,  
die Abflüß Richtung Hepprum macht wärrer frei!

Die Birgit, unne fun de Rous,  
hot jetzt gedenkt, wos mach ich blouß,  
häbb 75ischährisches,  
do muss bassier aach mol ebbes,

do owwe iss jetzt die Adria,  
do mach ich oner uff Toskana.  
So hot se sich, mit gonzer Kraft,  
e Espresso-Maschin jetzt ougeschafft!  
So gibt's jetzt bei drei Bergsträsser Woi,  
en Espresso und der iss frei!

Adria, Toskana, die häwwe gude Woi,  
doch aach unser Bergsträsser, ja der leeft gut noi! Prost!

**Kapelle: Wenn bei Capri die rote Sonne....**

In Hoamboch sinn meer uff de Zeit,  
bestelle Klamotte im Internet heit,  
en Mausclick un schun kimmt mit Schwung,  
do schee bestellt die Quelle-Sendung.  
In Hoamboch mache des, sou veel Leit wie nie,  
aach unser Tilgers-Stefanie,  
die im Owerdorf , die Tochter vum Josef unn Maria dehoam,  
mit einem Glick hatte en Troam!  
Neie Schu un en dolle Gertel,  
ich wärd die schenscht fum Owwerdorf-Värdel,  
gegogdt gedu, nur mit om Klick,  
kam des Paket per Poschd, -- die Steffi wor beglickt.  
Ausgepackt gonz ruck zuck,  
doch do hot se dumm geguggt,  
des Paket wor grouß un hott geblitzt,  
doch gebasst hot ofach nix.  
Do hotse, sou als Fraa vun Welt,  
des Paket zum Zurickschicke neue die Papiertonn gestellt.  
Ehr Vadder, der vun nix e Oahnung,  
ewwer steht mit 1000%ischer Ploanung,  
hot de Inhalt vun Papiertonn und des Paket vehement,  
genumme un im Gaade verbrennt.  
Denn er hott doch net gewißt,  
das im Paket aach noch en deire Inhalt drinn ist!



Letztendlich Schuh un Gartel worn verschmort,  
geroche hots im gonze Ort,  
un die Steffi musst, ich will net pralle,  
hot fun de Bestellung nix katt - doch musst se bezahle!

Un zu deer liewe Josef, stell dich druff oi,  
aach im leere Karton kann noch wos drin sou,  
Deshalb gug noi, vielleicht is noch wos drinn,  
sehr zum Wohl, orrer Gin-Gin!!!!

### **Lied: Kapelle**

Ich soags eich frei unn gonz adrett,  
es gibt fascht koa Jahr ohne Heddi in de Kerweredd!  
Desjahr hot se sich wos geleischt,  
sie hots halb Hoamboach schun gebeicht,  
die hot ehrn Karl, ehr Liewesglick,  
zum oikaafe noch Hepprum geschickt.  
Er sollt ehr bringe, die war gonz gut,  
Fleisch, Salat unn e Feischtichkeitscrem for ehr Schnut!  
Sou hot de Karl holt mit Bedacht,  
alles donn schee hoamgebracht.  
Doch leider hot se gonz galant,  
die Hautcreme vom Etikett her nett erkannt,  
unn stellt se, ja do is se foi,  
als Schmerkas in de Kiehlschronk noi.  
Drei Doag spater orrer sou,  
wo werrer Owendesse drou,  
un sou hektisch wie se iss,  
kam die Hautcreme uff de Disch.  
Als Frischkas un wie meers heert - streichzart,  
stand die Hautchrem sou gonz parat,  
bis de Karl donn hot gemerkt,  
do iss doch ebbes wos verkehrt!

Hai Hedi sagt er gonz benumme,

do hoschd du wos verkehrt genumme,  
ach säigtse doch gonz fix mit alle Sinne,  
rischdischi Schönheit kimmt holt von inne!

Iwigens Herr Parrer, ich häb mich besunne,  
die Kinner-Geburtewett hot die Kerwejugend gewunne!  
Fuffzäh musste es soi un fuffzaih sinn worn,  
die die lettschde drei Jahr sin geborn.  
Sou hoffe ich doch , des wär doch foi,  
sie holte aach ihr Wett druff oi,  
un dun ses Jahr, ich hoff, es dutt klinge,  
in de Hepprumer Boachgass for arme Kinner singe!  
Der Reinerlös, wie mer uns kennt,  
wärd naderlich aach gespennd.

Trotz Wirtschaftskrisis unn Finanzprobleme,  
losse meer unser Kerb nett nehme,  
aach wenn die Krise iss en Dorn im Aag,  
for die Kerwe is uns nix zu schad.

Feiert fröhlich, vergesst wos iss,  
denn iss uns sicher un gewiss,  
des feiern, des hilft uns beileibe,  
es kumme aach werrer onnern Zeite,  
unser Rousedaal is frehlich frei,  
kummt un seid all mit debei,

ich hoff, ich hää koans schlecht gemacht,  
Humor iss, wonn meer trotzdem lacht,  
hää ich ons uff die Schipp genumme,  
macht eich driwwer gar koan Kummer,  
moije gibt's e onri Nummer!  
En Woi en gute, dorch die Kehle,  
gäit meer dorch bis in die Seele,

hääbt veel Spaß, sog ich adrett,  
ehr Leit des wors, die Kerweredd!

Wem ist die Kerwe, - unser  
Die Kerwe sie lebe , hoch, hoch, hoch!

**Lied: Im Tale der Rosen**